

# 佛說十二佛名神呪校 量功德除障滅罪經

隋天竺三藏法師闍那崛多譯



南無本師釋迦牟尼佛


## 說明

本繁體校正版《佛說十二佛名神呪校量功德除障滅罪經》電子書，根據《高麗大藏經》大乘五大部外諸重譯經，第 0301 部，隋天竺三藏法師闍那崛多譯《佛說十二佛名神呪校量功德除障滅罪經》原藏影印本校正。句讀僅作參考。

本電子書是免費結緣品，特此說明。

仁慧草堂

二〇二〇年六月



掃碼關注仁慧草堂微信公眾號

## ●起誦儀

### 香讚

(一徧)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三徧)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三徧)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三徧)

南無三滿多. 母馱喃. 唵. 度嚕度嚕. 地尾. 娑婆訶

## 普供養真言

(三徧)

唵. 誝誝曩. 三婆嚩. 鞞日囉斛.

南無本師釋迦牟尼佛 (合掌三稱)

## 開經偈

(一徧)

無上甚深微妙法 百千萬劫難遭遇  
我今見聞得受持 願解如來真實義

# 佛說十二佛名神呪校量 功德除障滅罪經

隋天竺三藏法師闍那崛多譯

如是我聞：

一時，婆伽婆住王舍城耆闍崛山中，與大比丘衆千二百五十人俱；復有菩薩大衆一萬二千人俱，阿逸多菩薩爲首。

爾時，世尊告彌勒菩薩言：「彌勒，東方去此佛刹，有十不可說諸佛刹，億百千微塵等，過諸佛刹有一佛土，名曰：解脫主世界。彼世界內有一佛，名曰：虛空功德。清淨微塵。等目端正。功德相。光明華。波頭摩。瑠璃光。寶體香。最上香。供養訖。種種莊嚴。頂髻無量無邊。日月光明。願力莊嚴。變化莊嚴。法界出生。無障礙王如來、阿羅訶、三藐三佛陀，現在隨心欲行逍遙在處說法。若善男子、善女人，犯四重、五逆、誹謗三寶及犯四波羅夷，是人罪重，假使如閻浮履地變爲微塵，一一微塵成於一劫，是人有若干劫罪；稱是一佛名號、禮一拜者，悉得滅除，況復晝夜受持讀誦，憶念不忘者？是人功德不可思

議。而彼佛世界中，有菩薩名無比，無障礙王如來授彼菩薩記：『當得成佛，號豪相日月光明華。寶蓮華堅如金剛身。毗盧遮那無障礙眼。圓滿十方。放光照一切佛刹。相王如來、阿羅訶、三藐三佛陀、善逝、世間解、無上士、調御丈夫、天人師、佛、世尊』。

「彼東方復有佛，名曰：一切莊嚴無垢光如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「南方有佛，名曰：辯才瓔珞思念如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「西方有佛，名曰：無垢月相王名稱如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「北方有佛，名曰：華莊嚴作光明如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「東南方有佛，名曰：作燈明如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「西南方有佛，名曰：寶上相名稱如來、阿

羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「西北方有佛，名曰：無畏觀如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「東北方有佛，名曰：無畏無怯毛孔不豎名稱如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「下方有佛，名曰：師子奮迅根如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。

「上方有佛，名曰：金光威王相似如來、阿羅訶、三藐三佛陀。亦應當稱彼佛名，亦修恭敬，亦須稱其名號，亦須心念彼佛名號。」

爾時，佛告彌勒：「若有正信善男子、正信善女人，稱此十二諸佛名號之時，經於十日，當修懺悔一切諸罪，一切衆生所有功德皆隨喜，勸請一切諸佛久住於世，以諸善根迴向法界。是時，即得滅一切諸罪，得淨一切業障，即得具足成就莊嚴一切佛土，成就具足無畏；復得具足莊嚴身相，復得具足菩薩眷屬圍繞，復得具足無量陀羅尼，復得具足無量三昧，復得具足如意佛刹莊嚴，

亦得具足無量善知識。速得成就，如上所說，不增不減。在於煩惱中行阿耨多羅三藐三菩提，而得端正可喜果報；亦得財寶充足；常生大姓豪族種姓之家，身相具足；亦得善和眷屬圍繞。」

爾時，世尊重宣此義，而說偈言：

若有善男子 若善女人等  
受持此佛名 生生世世中  
得他人愛敬 光明威力大  
生處爲人尊 於後得成佛

佛復告彌勒：「若有善男子、善女人，若當受持此佛名者，亦須誦此陀羅尼呪：

多經他<sup>一</sup>阿企<sup>二</sup>摩企<sup>三</sup>三曼多目企<sup>四</sup>燥帝育羯  
帝<sup>五</sup>尼陸帝<sup>六</sup>尼陸帝鉢脾<sup>七</sup>三摩余祇<sup>八</sup>質多毗拔帝<sup>九</sup>  
阿企<sup>十</sup>摩企<sup>十一</sup>摩陀禰<sup>十二</sup>毗拔帝<sup>十三</sup>三漫多求禰<sup>十四</sup>薩底耶  
羅彌<sup>十五</sup>育吉帝<sup>十六</sup>鉢育吉帝<sup>十七</sup>醯利彌利摩私隸<sup>十八</sup>阿喃  
迷<sup>十九</sup>遮迷<sup>二十</sup>頌質智<sup>二十一</sup>末質智<sup>二十二</sup>步支<sup>二十三</sup>阿羅醯<sup>二十四</sup>婆  
休眇<sup>二十五</sup>摩逾伽羅醯<sup>二十六</sup>醯摩婆帝<sup>二十七</sup>殊帝摩帝<sup>二十八</sup>達  
摩真帝<sup>二十九</sup>周多朋枳<sup>三十</sup>阿毗差脾<sup>三十一</sup>阿羅陀婆叉彌<sup>三十二</sup>  
娑捷陀毗拔帝<sup>三十三</sup>那摩薩婆<sup>三十四</sup>佛陀菩提薩多脾毗  
耶<sup>三十五</sup>悉田妬漫帶波陀<sup>三十六</sup>佛陀提瑟帝多<sup>三十七</sup>

爾時，世尊說是呪已，重說偈言：

受持此呪者 得值六十億



現在十方佛	常憶念是人
一切受生處	常遇善知識
心欲所願者	一切皆吉祥
誦此陀羅尼	常生諸佛前
微妙蓮華上	化生不受胎
正念正行意	增長智慧等
一聞悉總持	所聞不忘失
受持此呪者	獲得如是福
誦此佛名者	彼人所生處
遠離諸惡道	速得生善處
得陀羅尼定	最妙最勝處
受持不忘失	乃至於菩提
皆由諸佛名	及以陀羅尼
若人施七寶	滿千萬億刹
受持此佛名	福報過於彼
行於菩提行	恒常識宿命
遠離諸衆難	即得自在處
常生有佛刹	值佛聞正法
得於信行心	得是信心已
常即供養佛	值佛聞法已
心生大歡喜	得見諸佛已
持妙供養具	供養於諸佛

受持佛名者	千萬諸億劫
捨離生死罪	速成於佛道
若人能至心	七日誦佛名
得於清淨眼	能見無量佛
能持此佛名	即得無量福
是人所生處	天人常恭敬
若人持佛名	千萬億劫中
不被他毀辱	一切世界中
名聞悉流布	若人持佛名
千萬億劫中	天人常供養
無有毀之者	速得成佛道
若人持佛名	不生怯弱心
智慧無諂曲	常在諸佛前
若人持佛名	彼人所生處
天龍諸夜叉	乾闥緊那羅
修羅迦樓羅	及摩睺羅伽
人與非人等	常供養是人
若人持佛名	世世所生處
常生富貴家	丈夫相具足
無有慳妬心	猛健好布施
身體諸毛孔	常出諸妙香
口中諸齒間	復出氛氳香

天赤梅檀香	及諸餘香氣
千萬億劫中	常香無斷絕
世世所生處	其聲如梵天
亦如迦陵頻	命命等諸鳥
持法王名者	其福亦如是
若人持佛名	七寶華中生
其華千億葉	威光相具足
若人持佛名	父母諸眷屬
和顏無諍訟	永不生別離
若有諸女人	受持此經者
捨離女人形	轉生智男身
得男子身已	即成於菩提
轉無上法輪	隨意入涅槃
若人持佛名	刀杖不能害
水火不焚漂	縣官不能殺
若人持佛名	衆魔及波旬
行住坐卧處	不能得其便
若人持佛名	世世所生處
身通遊虛空	能至無邊刹
面覩於諸佛	能問甚深義
彼等無量佛	即知其心意
爲說微妙法	授彼菩提記

得聞授記已 心生大歡喜  
即於諸佛教 決定無有疑  
彼諸佛世尊 所說甚深法  
其人聞法已 受持永不失  
於後得成就 六度及諸地  
無畏諸力等 衆相及諸好  
佛刹及衆生 任意隨所取  
生於彼刹中 速能成正覺  
轉無上法輪 隨意入涅槃  
若有善男子 及善女人等  
受持此經者 如上說功德  
若持此經者 謹慎莫放逸  
聞如前福業 若滿於一劫  
若減於一劫 常須勤讀誦  
不生懈怠心 我勅有如是  
此等諸佛者 常住功德藏  
虛空雲中王 常住於彼處  
若人聞佛名 一劫減一劫  
聞已生敬心 彼是最健人  
亦是大智慧 亦是人中最  
亦是健丈夫 於世大名聞  
是故我今言 彌勒當聽我

有大智慧人 巧解方便者  
常勤不放逸 恒近善知識  
得聞此經典 後趣菩提道

佛說此經已，彌勒菩薩摩訶薩及諸菩薩衆、大比丘衆、天、龍、夜叉、乾闥婆、阿修羅、迦樓羅、緊那羅、摩睺羅伽、人、非人等，聞佛所說，歡喜奉行。

佛說十二佛名神呪校量功德除障滅罪經

## ● 結誦儀

### 十二佛名神呪

(合掌三稱)

南無虛空功德，清淨微塵，等目端正，功德相，光明華，波頭摩，瑠璃光，寶體香，最上香，供養訖，種種莊嚴，頂髻無量無邊，日月光明，願力莊嚴，變化莊嚴，法界出生，無障礙王如來、阿羅訶、三藐三佛陀

南無豪相日月光明華，寶蓮華堅如金剛身，毗盧遮那無障礙眼，圓滿十方，放光照一切佛刹，相王如來、阿羅訶、三藐三佛陀、善逝、世間解、無上士、調御丈夫、天人師、佛、世尊

南無一切莊嚴無垢光如來、阿羅訶、三藐三佛陀

南無辯才瓔珞思念如來、阿羅訶、三藐三佛陀

南無無垢月相王名稱如來、阿羅訶、三藐三佛陀

南無華莊嚴作光明如來、阿羅訶、三藐三佛陀

南無作燈明如來、阿羅訶、三藐三佛陀

南無寶上相名稱如來、阿羅訶、三藐三佛陀

南無無畏觀如來、阿羅訶、三藐三佛陀

南無無畏無怯毛孔不豎名稱如來、阿羅訶、  
三藐三佛陀

南無師子奮迅根如來、阿羅訶、三藐三佛陀

南無金光威王相似如來、阿羅訶、三藐三佛  
陀

陀羅尼呪曰：

多經他<sup>一</sup>阿企<sup>二</sup>摩企<sup>三</sup>三曼多目企<sup>四</sup>燥帝育羯  
帝<sup>五</sup>尼陸帝<sup>六</sup>尼陸帝鉢脾<sup>七</sup>三摩余祇<sup>八</sup>質多毗拔帝<sup>九</sup>  
阿企<sup>十</sup>摩企<sup>十一</sup>摩陀禰<sup>十二</sup>毗拔帝<sup>十三</sup>三漫多求禰<sup>十四</sup>薩底耶  
羅彌<sup>十五</sup>育吉帝<sup>十六</sup>鉢育吉帝<sup>十七</sup>醯利彌利摩私隸<sup>十八</sup>阿喃  
迷<sup>十九</sup>遮迷<sup>二十</sup>頰質智<sup>二十一</sup>末質智<sup>二十二</sup>步支<sup>二十三</sup>阿羅醯<sup>二十四</sup>婆  
休眇<sup>二十五</sup>摩逾伽羅醯<sup>二十六</sup>醯摩婆帝<sup>二十七</sup>殊帝摩帝<sup>二十八</sup>達  
摩眞帝<sup>二十九</sup>周多朋枳<sup>三十</sup>阿毗差脾<sup>三十一</sup>阿羅陀婆叉彌<sup>三十二</sup>  
娑撻陀毗拔帝<sup>三十三</sup>那摩薩婆<sup>三十四</sup>佛陀菩提薩多脾毗  
耶<sup>三十五</sup>悉田妬漫帶波陀<sup>三十六</sup>佛陀提瑟帝多<sup>三十七</sup>

## 補闕真言

(三徧)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛拏. 吽. 潑抹拏. 娑  
婆訶.

## 補闕圓滿真言

(三徧)

唵. 呼嚧呼嚧. 社曳穆契. 莎訶

## 普回向真言

(三徧)

唵<sup>一</sup>娑摩囉<sup>二</sup>娑摩囉<sup>三</sup>彌摩曩<sup>四</sup>薩哈<sup>呼馬切</sup>囉<sup>五</sup>摩訶<sup>爻上聲</sup>咱<sup>六</sup>  
哈囉吽<sup>六</sup>

## 禮佛發願文

(一徧)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性, 枉入迷流。隨生死以飄  
沉, 逐色聲而貪染。十纏十使, 積成有漏之因;  
六根六塵, 妄作無邊之罪。迷淪苦海, 深溺邪途。



著我耽人，舉枉措直。累生業障，一切愆尤，仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之

汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一徧)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

十方三世一切佛。一切菩薩摩訶薩。摩訶般若波羅蜜。

## 三皈依

(一徧)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；  
自皈依僧，當願眾生，統理大眾，一切無礙。和南聖眾。

# 南无护法韦驮尊天菩萨



ཡིག་ནི་ཤུ་ཅུ་གཤམ་འདི་དཔེ་ཆའི་ནང་དུ་བཞག་ན་དཔེ་ཆ་དེ་ཅི་འདུན་  
བསོ་མས་ཀྱང་ཉེས་པ་མི་འབྱུང་བར་འཇམ་དཔལ་ཅ་རྒྱུད་ལས་གསུངས་སོ།།

此咒置經書中可滅誤跨之罪